

不生亦不滅	不常亦不斷	不一亦不異	不來亦不出
能說是因緣	善滅諸戲論	我稽首禮佛	諸說中第一
諸法不自生	亦不從他生	不共不無因	是故知無生
如諸法自性	不在於緣中	以無自性故	他性亦復無
因緣次第緣	緣緣增上緣	四緣生諸法	更無第五緣
果爲從緣生	爲從非緣生	是緣爲有果	是緣爲無果
因是法生果	是法名爲緣	若是果未生	何不名非緣
果先於緣中	有無俱不可	先無爲誰緣	先有何用緣
若果非有生	亦復非無生	亦非有無生	何得言有緣
果若未生時	則不應有滅	滅法何能緣	故無次第緣
如諸佛所說	真實微妙法	於此無緣法	云何有緣緣
諸法無自性	故無有有相	說有是事故	是事有不然
略廣因緣中	求果不可得	因緣中若無	云何從緣出
若謂緣無果	而從緣中出	是果何不從	非緣中而出
若果從緣生	是緣無自性	從無自性生	何得從緣生
果不從緣生	不從非緣生	以果無有故	緣非緣亦無

中論觀去來品第二(二十五偈)

已去無有去	未去亦無去	離已去未去	去時亦無去
動處則有去	此中有去時	非已去未去	是故去時去
云何於去時	而當有去法	若離於去法	去時不可得
若言去時去	是人則有咎	離去有去時	去時獨去故

若去時有去	則有二種去	一謂爲去時	二謂去時去
若有二去法	則有二去者	以離於去者	去法不可得
若離於去者	去法不可得	以無去法故	何得有去者
去者則不去	不去者不去	離去不去者	無第三去者
若言去者去	云何有此義	若離於去法	去者不可得
若去者有去	則有二種去	一謂去者去	二謂去法去
若謂去者去	是人則有咎	離去有去者	說去者有去
已去中無發	未去中無發	去時中無發	何處當有發
未發無去時	亦無有已去	是二應有發	未去何有發
無去無未去	亦復無去時	一切無有發	何故而分別
去者則不住	不去者不住	離去不去者	何有第三住
去者若當住	云何有此義	若當離於去	去者不可得
去未去無住	去時亦無住	所有行止法	皆同於去義
去法即去者	是事則不然	去法異去者	是事亦不然
若謂於去法	即爲是去者	作者及作業	是事則爲一
若謂於去法	有異於去者	離去者有去	離去有去者
去去者是二	若一異法成	二門俱不成	云何當有成
因去知去者	不能用是去	先無有去法	故無去者去
因去知去者	不能用異去	於一去者中	不得二去故
決定有去者	不能用三去	不決定去者	亦不用三去
去法定不定	去者不用三	是故去去者	所去處皆無